

मार्निंग डोगरी न्यूज़ बुलेटिन, समे. 09-20 Hrs

<><><><><><>

Headlines

- केन्द्री गृह सचिव गोविंद मोहन होरें जम्मू च सुरक्षा हालात दा जायजा लैता। बैठक दरान औंदी अमरनाथ जात्तरा ते आतंकवाद—रोधी अभियानें पर मुख करी ध्यान केन्द्रित कीता गेआ।
- लेफ्टिनेंट गवर्नर मनोज सिन्हा होरें कठुआ च इक नाबालिग सने कुल 3 लोकें दी हत्तेआ आहले मामले दी व्यापक ते पारदर्शी जांच करोआने दा हुक्म रसाल कीता ऐ।
- जम्मू—कठुआ—सांबा रेंज दे डीआईजी होरें आखेआ ऐ जे कठुआ च होई दिऐ हत्तेआएं दी जांच लेई टीम खडेरी गई ऐ ते इस मामले दे सभ्मनें पैहलुएं दी जांच कीती जाह्ग।
- लेफ्टिनेंट गवर्नर मनोज सिन्हा होरें आखेआ ऐ जे खेलो इंडिया विन्टर गेम्स, एक भारत—श्रेष्ठ भारत दे जज्बे गी दर्शादिआं न।
- ते क्रिकेट च भारत नै जंदी रातीं दुबई च खेड्ढे गेदे आईसीसी चैंपियंस ट्रॉफी दे फाइनल मुकाबले च न्यूजीलैंड गी हराइयै रिकार्ड त्रीऽ बारी एह् खिताब जित्ती लैता ऐ।

<><><><><><>

Union Home Sec Meet

केन्द्री गृह सचिव गोविंद मोहन होरें जंदे रोज जम्मू च इक उच्ची सतह दी सुरक्षा जायजा बैठक दी प्रधानता कीती जिस दरान खित्ते दे सुरक्षा हालात, आतंकवाद—रोधी अभियानें ते नमें पैदा होआ करदे खतरें बक्खी ध्यान केन्द्रित कीता गेआ। इस बैठका च जम्मू—कश्मीर पुलसा दे डरैक्टर जनरल नलिन प्रभात हुंदे सने आईजी भीम सेन टूटी ते वी.के. बिरदी होरें बी हिस्सा लैता। इस मौके उपपर औंदी अमरनाथ जात्तरा लेई सुरक्षा प्रबंधें, आतंकवाद—रोधी रणनीतिएं दी समीक्षा ते नमें पैदा होआ करदे खतरें, खासकरियै घुसपैठ दिऐ कोशशें कन्नै निब्बड़ने दे बारै च मुख तौरा पर चर्चा कीती गई। जम्मू—कश्मीर च रमानदारी ते स्थिरता बरकरार रक्खने सरबंधी हीलें च बाददा करने दे मकसद कन्नै एह् बैठक लाई गई ही। एह्दे शा पैहले पिच्छले म्हीने गृह मंत्री अमित शाह होरें नमीं दिल्ली च इससै चाल्ली दी इक बैठक दी प्रधानता कीती ही।

<><><><><><>

LG Kathua Killings

उपराज्यपाल मनोज सिन्हा होरें कठुआ जिले च इक्कै परोआर दे 3 रिश्तेदारें दी हत्तेया आले मामले दी व्यापक ते पारदर्शी जांच दा हुक्म दित्ता ऐ। मारे गेदे लोकें दी पंछान 15एं ब'रे दे वरुण सिंह, 32एं ब'रे दे योगेश सिंह ते 40एं ब'रे दे दर्शन सिंह दे तौरा पर कीती गेदी ऐ ते इंदे त्रौनें दे शव जंदे शनिवारें कठुआ जिले दे दूर दरेड़े इलाके मल्हार च इशु नाले थमां बरामद कीते गे। एह त्रौनें जनें जंदी 5 मार्च गी लापता होई गे हे। सोशल मीडिया पर इक पोस्ट च उपराज्यपाल होरें आखेआ ऐ ते उनें इस मामले दी व्यापक ते पारदर्शी जांच दा हुक्म रसाल कीता ऐ ते प्रभावत परोआरें गी हर मुमकन मदाद दित्ती जाग। श्री सिन्हा होरें लोकें गी जकीन दोआया ऐ जे दोषिएं दा तौले पता लाइयै उंदे खलाफ सख्त कारवाई पक्क गै कीती जाग। उपराज्यपाल होरें मारे गेदे लोकें दे परोआरें प्रति हमदर्दी जताई ऐ। तोआइं मुख्यमंत्री उमर अब्दुल्ला होरें बी कठुआ च इक नाबालिग सनें कुल त्रै जनें दी हत्तेया दी सख्त निंदेया कीती ऐ। उनें आखेआ ऐ जे ऐसी बेहशियना कारवाई लेई समाज च कोई थाहर नेइ ऐ ते एह्दी सख्त लफ्जे च निंदेया कीती जानी लोड़चदी। उमर होरें सौगी परोआरें कन्नै हमदर्दी जताई ऐ।

<><><><><><>

DIG Team

कठुआ जिले च इक नाबालिक जागते सनें कुल 3 लोकें दी हत्तेया आले मामले दी जांच लेई इक टीम खडेरी गई ऐ। जम्मू-कठुआ-सांबा रेंज दे डीआईजी शिव कुमार होरें आखेआ ऐ जे मामले च आखर होआ केह ऐ, एह जांच दा विशे ऐ इस करियै इस मामले दे सब्बने पैहलुएं दी जांच कीती जाग ते जांच दे नतीजे गी तौले गै सार्वजनिक बी कीता जाग। इस बारे मीडिया कन्नै गल्ल करदे होई डीआईजी शिव कुमार होरें आखेआ.....

<><><><><><>

CS-Business

मुख्य सचिव अटल डुल्लू होरें नागरिक ते कारोबारी संस्थान दी सहूलत लेई सरकारी मैहकमे च मजूदा सब्बने गैर जरूरी अनुपालनें दी पंछान करने दा निर्देश दित्ता ऐ। एह गल्ल उनें केन्द्र शासत प्रदेश च कारोबार च सहूलत गी बधाने दे मकसद कन्नै कारोबार सुधार कार्य योजना 2024 दी प्रगति दी समीक्षा लेई आयोजित इक बैठक दी अध्यक्षता करदे होई आक्खी। उनें फैसले लैने दी प्रक्रिया व समावेशन गी जकीनी बनाने लेई दौनें डिजीजनें च सब्बने सरबंघत लोकें ते हितधारकें कन्नै बक्ख-बक्ख सें दा आयोजन करने दी सलाह दित्ती।

<><><><><><>

AYUSH Ramban

आयूष मैहकमा रामबन लोकें दी सेहत दी दिक्खभाल ते दुआइएं दे बपार च नैतिक प्रथाएं गी बढ़ावा देने लेई महत्व आली गैंह पुट्टा करदी ऐ, जेह्दे च दुआइएं सरबंधी गतिविधिएं गी नियमित करने ते ओह्दी निगरानी लेई तोले गै इक अभियान शुरू कीता जाग। जेह्दे कन्नै गैर मंजूर दुआइएं दी बंड उप्पर रोक लाई जाग। मैहकमा उनें आयुर्वेदिक कंपनिएं उप्पर नेड़मी तकक रक्खी करदा ऐ। जेह्दी कंपनियां सौ फीसदी सेहत ठीक करने दा दावा करा'रदियां न। उत्पादें दी विवासनीयता गी लकीनी बनाने लेई आयुर्वेदिक मैडिकल दकानें पर बी नमूने दी जांच कीती जाग। मैहकमे आस्सेआ लोकें गी आखेआ गेआ ऐ जे ओह् उनें लोकें ते मैडिकल स्टोरें दी जानकारी देन जेह्दे खास तौर पर युवाएं गी नशे आस्तै दुआइयां देआ'रदे न। वरिष्ठ मैडिकल अफसर ते डिस्ट्रिक्ट योगा कोआर्डिनेटर डॉ. मसूद इकबाल जरगर होरें इस बारे गल्ल करदे होइ आखेआ.....

<><><><><><>

LG Winter Games

उपराज्यपाल मनोज सिन्हा होरें लोकें च शांति ते एकता गी बढ़ावा देने लेई खेड्ड भावना ते भाईचारे ते महत्व उप्पर जोर दित्ता। जेह्दी संजा गुलमर्ग च 5में खेलो इंडिया स्यालू खेड्डें दे उद्घाटन समारोह च बोलदे होई उपराज्यपाल होरें आखेआ जे खेलो इंडिया स्यालू खेड्डां “एक भारत श्रेष्ठ भारज;; दी भावना दी प्रतीक ऐ। उनें जम्मू कश्मीर गी राश्ट्री ते अंतर्राष्ट्रीय खेड्डें आयोजनें लेई हब च बदलने उप्पर जोर पाया। उनें बक्ख-बक्ख हित धारकें दा आभार प्रगट करदे होई इस क्षेत्र दी उपलब्धिएं उप्पर खुशी जाहर कीती। जिंदे च 3 दाहकें मगरा कश्मीर घाटी च अंतर्राष्ट्रीय क्रिकेट दी वापसी बी शामिल ऐ। उपराज्यपाल होरें 92में खेलो इंडिया सेंटरें च 4 जहार 5 सौ खडारिएं गी सिखलाई देने ते नगरोटा च खेल गांव दे विकास जनेह् मुख पैहलकदमिएं गी बी सांझा कीता। इस मौके उप्पर बोलदे होई उपराज्यपाल होरें आखेआ.....

<><><><><><>

KIWG 2025

खेलो इंडिया विंटर गेम्स 2025 दे अज्ज दुए ध्याड़े बी रोमांच अपनी चरम सीमा पर होग कीजे 4 बक्ख-बक्ख चाल्ली दे खेड्ड मुकाबलें च 800 शा मते खड्डारी अपना दम-खम दस्सडन। इ'नें स्यालू खेड्डें दा कल पैह्ला ध्याड़ा बी बड़े रोमांच कन्नै भरोचे दा रेहा। मर्दे दे स्नोबोर्डिंग सलालोम च जम्मू-कश्मीर दे मेहराजुद्दीन खान नै सुन्ने दा तगमा जिसलै के जम्मू-कश्मीर दे जुबेर अहमद लोन नै चांदी दा तगमा ते सेना दे विवेक राणा नै कैह् दा तगमा जित्तेआ। महिलाएं दे स्नोबोर्डिंग सलालोम च उत्तराखंड दी मेनका गुंजियाल नै सुन्ने दा तगमा जित्तेआ।

इस्सै चाल्ली स्कीं माउंटैनियरिंग दे मुकाबले च सेना दे राजेश्वर सिंह होरें अपना दबदबा बनाई रखेआ। तोआई एल्पाइन स्कींग च हिमाचल प्रदेश दे योगेश कुमार नै जित्त हासल कीती जदके महिलाएं दे 5 किलोग्राम नार्डिक स्कीइंग मुकाबले च भवानी थेकड्डा नै सुन्ने दा तगमा अपने नांS कीता।

<><><><><><>

ICC India Win

जंदी रातीं दुबई अंतर्राष्ट्री क्रिकेट स्टेडियम च खेड्ढ गेदे आईसीसी चैंपियंस ट्रॉफी दे फाइनल च भारत नै न्यूजीलैंड गी 4 विकेटें कन्नै हराइयै इक नमां इतिहास रचदे होई रिकार्ड त्रीS बारी चैंपियंस ट्रॉफी दा खिताब अपने नांS करी लैता ऐ। 252 द्रौड़ें दे लक्ष्य दा पिच्छा करदे होई भारत नै इक ओवर बाकी रौह्दे जित्त हासल करी लैती। भारत दी जित्त च कप्तान ते सलामी बल्लेबाज रोहित शर्मा ते शुभमन गिल बश्कार होई दी 105 रन्जें दी सांझेदारी न अहम भूमिका निभाई। एह्दे अलावा अक्षर पटेल, श्रेयस अय्यर ते हार्दिक पांड्या नै बी इस जित्त च अहम भूमिका निभाई। रोहित शर्मा होरें'गी प्लेयर ऑफ दा मैच ते न्यूजीलैंड दे रचिन रविन्द्रा गी प्लेयर ऑफ द टूर्नामेंट घोशत कीता गेआ। राष्ट्रपति द्रौपदी मुर्मु, प्रधानमंत्री नरेन्द्र मोदी, एलजी मनोज सिन्हा ते मुख्यमंत्री ओमर अब्दुल्ला होरें बी इस ऐतिहासिक जित्त पर भारती क्रिकेट टीम गी ममारखां दित्तिआं न।

<><><><><><>